



明詩綜卷一上

小長蘆 朱彝尊 錄

休陽 汪 森 緝評

太祖高皇帝 三首

帝諱元璋姓朱氏字國瑞濠之鍾離東鄉人元

至正十一年辛卯起兵丁未稱吳元年戊申建

元洪武在位三十一年崩葬孝陵 在應天府治東北鍾山之陽 永

樂元年上尊諡曰聖神文武欽明啓運俊德成

功統天大孝高皇帝廟號太祖嘉靖十七年改

上尊諡曰開天行道肇紀立極大聖 二 仁文

義武俊德成功高皇帝有御製詩集五卷

神鳳操

鈞天奏兮列丹墀俄翩翩兮鳳皇儀斂翱翔兮淒梧枝
彼觀德兮直為我辭

鍾山賡吳沉韻

嵯峨倚空碧環山皆拱伏遙岑如劒戟邇洞非茅屋青
松秀紫崖白石生玄谷巖畔毓靈芝峰頂森神木時時
風雨生日日山林沐和鳴盡啼鶯善舉皆飛鵠山中道
者禪隴頭童子牧試問幾經年答云常辟穀

春望牛首

遙岑峙立勢蒼然春日鶯啼景物鮮疊嶂倚天江月外
三山映帶石城邊

劉基曰皇帝提一旅之衆龍飛淮甸不十年間本有區宇自古以來武功之盛未之有也及夫萬幾之暇作為文章舉筆立就莫不雄深宏偉言雅而旨遠真所謂天生聰明可望而不可及者矣 宋濂曰皇帝臨御以來用人文化成天下天縱聖能形諸篇翰揮灑之際不待凝神而思若淵泉有長江大河一瀉萬里之勢自然度越千古 郭傳曰自漢而下興王代作然文經武緯一弛一張率不能兼濟其美惟唐太宗以兵力定亂及踐祚之後詞章奮發論者以其雕奇鏤彩徒與騷人韻士爭錙銖之巧惟皇上以一旅取天下不數年間混一南北至萬幾之暇復游心道學志存詩書寓辭竹帛親榻管翰意無停機一揮數千百言粹然出於情性之正 解縉曰臣少侍高皇帝早暮載筆墨楮以俟聖情尤喜為詩歌睿思英發雷轟電燭玉音沛然數千百言一息無滯臣輒草書連幅筆不及成點畫上進才點定數韻而已或不更一字故嘗喜誦古人鏗錡炳朗之作尤惡寒酸伊嚶齷齪鄙陋以為衰世之調為不足觀詩僧宗泐進所精思刻苦以為得意之作百餘篇上一覽不竟日盡和其韻雄深闊偉下視泐詩真大明之於爛火也 陸釵曰洪惟太祖應天順人創業垂統巍乎成功煥乎文章稱盛美矣 鄭曉曰上初不識書每退朝暇延接儒士講論經典又取古帝王嘉言善行書之殿廡出入省視作為文章揮筆立就或命侍臣立榻下操觚授詞混混千言皆淳雅高簡洞達物情動引經史足法萬世 高岱曰太祖以武功定天下而崇尚文學如飢渴之於飲食每得儒臣皆以腹心帷幄朝夕諮訪不倦至於解析經義又多天縱神啓有非老師宿儒之所能及者 朱國祚曰高皇帝詩發乎天籟自然成音當日賡歌颺言匪僅

唐吳樂宋四學士而已若荅祿與權吳伯宗劉仲質張翼宋璲朱芾桂
慎戴安王釐周衡吳詰馬從馬懿易毅盧均裴植李睿韓文輝曹文壽
單仲右諸臣進詩咸賡其韻今諸臣之作
十九無聞而聖藻長垂宇宙高矣美矣

靜志居詩話孝陵不以馬上治入下雲雨賢才天地大文形諸篇翰七
年而御製成集八年而正韻成書題詩不惹之菴置酒滕王之閣賞心
胡閏蒼龍之詠擊節王佐黃馬之謠日曆成編和黃秀才自作大官設
宴醉宋學士有歌顧天祿經進詩篇披之便殿桂彥良臨池聯句媿於
颺言韻事特多更僕難數惟其愛才不及因之觸物成章宜其開創之
初遂見文明之治江左則高楊張徐中朝則詹吳樂宋五先生蜚聲嶺
表十才子奮起閩中而三百
年詩教之盛遂超軼前代矣

成祖文皇帝

一首

帝諱棣高皇帝第四子初封燕王之國北平建

文元年稱兵靖難四年入金川門建文帝自焚

或傳帝即位革除建文年號稱洪武三十五年踰

出亡

年建元永樂在位二十二年崩於榆木川葬長

陵

在昌平州北一十八里天壽山

諡曰體天弘道高明廣

嘉靖十七年更廣為肇

運

聖武神功純仁至孝文皇帝廟號太宗嘉靖中

更成祖有御製集

勃泥長寧鎮國山詩

實錄永樂六年十二月丁丑遣中官張謙行人周航護送嗣淳泥國王遐旺等還國初故淳泥國王麻那惹加耶乃言蒙朝廷厚恩賜封王爵國之境土皆屬職方而國有後山乞封為一國之鎮至是其子遐旺復以為請遂封其山為長寧鎮國之山命謙等即其地樹碑上親製文系

之以詩

炎海之墟淳泥所處煦仁漸義有順無忤悽悽賢王惟
化之慕導以象胥適來奔赴同其婦子兄弟陪臣稽顙
闕下有言是陳謂君猶天遣其休樂一視同仁匪偏厚
薄顧茲鮮德弗稱所云浪舶風檣實勞懇勤稽古遠臣

順來怒赴以躬或難矧曰家室王心亶誠金石其堅西南蕃長疇與王賢直直直高山以鎮王國鑱文於石懋昭王德王德克昭王國休寧於萬斯年仰我大明

錢謙益曰帝神武丕烈戎馬之餘鋪張文治御製集藏壽天府不傳人間惟賜榮公詩御書用紫粉金龍箋後題云八月十三日旁有為善最樂圖書少師攜至常熟入餘慶書院守僧淨心少與榮公同衣鉢謂之曰御製第二詩有餘慶二字留此永鎮山門今在院中 沈德符曰文皇帝封外國山者凡四永樂三年十月封滿刺加國西山曰鎮國山四年正月封日本國鎮山曰壽安鎮國之山六年十二月封淳泥後山曰長寧鎮國之山十四年十二月封柯枝國中山曰鎮國山皆出御製詩文以炳耀海外且詞旨雋蔚斷非視草解楊諸臣所能辦因思唐文皇帝力僅伸於漠北而屈於遼水若文皇帝威德直被東南古所未寶之國最負穹碑昭回雲漢萬禩所無也

詩話長陵稱兵靖難踐位之後加意人文成均視學有碑闕里褒崇有述以及姑蘇寶山之石武當太岳之宮靡不親製宸章勒之豐碣而又五經四書性理大全有書聖學心法有書大典有書文華寶鑑有書為善陰騭有書孝順事實有書務本之訓有書不獨紀之以事抑且系之以詩至於過兗州則賜魯藩於吳則壽榮國交趾明經甘潤祖等一十一人庶常吉士曾榮等二十八宿咸承寵渥三勒石於幕南之廷四建

碑於海外之國此謚法之所以定爲文與由是文子文孫復加繼述內閣則有三楊翰林則有四王尚書則東王西王祭酒則南陳北李觀燈侍宴拜手磨歌嗚呼盛矣

仁宗昭皇帝 二首

帝諱高熾成祖長子建元洪熙在位一年崩葬

獻陵

在天壽山
西峰之下

謚曰敬天體道純誠至德弘文欽

武章聖達孝昭皇帝廟號仁宗有御製文集二

十卷詩集二卷

冬至賜贊善徐好古

清朝盛文治輔德資儒耆念彼筋力倦趨朝諒非宜賦
詩有佳致納誨多良規起予得深趣歡懷浩
陽
屆初復况此承平時酬勞有尊酒庶以勞期頤

池亭納涼

夏日多炎熱臨池憩午涼
雨滋槐葉翠風過藕花香
舞燕來青瑣流鶯出建章
援琴彈雅操民物樂時康

詩話獻陵天稟純明雅志經術東朝監國命徐贊善善述纂尚書直指
進講詩成亦命善述改竄令旨呼其字而不名又嘗與曾少詹祭廢和
如江樓秋望詩云蘋洲晴亦雪楓岸書常霞絕似
唐太宗設享年加永則成功文章魏煥何如焉

宣宗章皇帝

九首

帝諱瞻基仁宗長子建元宣德在位十年崩葬

景陵

在天壽山東峰之下

諡曰憲天崇道英明神聖欽文昭

武寬仁純孝章皇帝廟號宣宗有御製文集四

十四卷詩集六卷

猗蘭操

有序

昔孔子自衛反魯隱居國中見蘭之茂與衆草
伍自傷不逢時而託爲此操予慮在野之賢有
未出者故擬作焉

蘭生中谷子曄曄其芳賢人在野子其道則光嗟蘭之
茂子與衆草爲伍嗚呼賢人子汝其子輔

思賢詩

有序 宣德九年正月

子嗣守祖宗大位夙夜兢惕思惟致治之道必
有賢臣相與贊輔雖屢詔求賢然恭默之思未
已乃作詩以著予志詩曰

天命有赫付畀萬方肆予承之夙夜弗遑亮天之工其
責在予亦惟求賢以作心膂堯舜大聖咨于臣鄰湯武

致治敷求哲人稷契皋夔周召伊傅同德一心以匡以
輔惟時匡輔百工允釐治效之隆臻于皞熙悠悠我心
念之勿置欲得羣賢以弼予治告言惓惓束帛戔戔命
彼皇華歷于丘園庶幾多才拔茅連茹奮其功庸翼我
王度惟天昭昭維嶽降靈篤生賢哲聿馳駿聲啓心沃
朕以迪先德揚其耿光有永無斁

賜許廓巡撫河南

實錄許廓字文超河南襄城人由國子生授綿衣衛經歷擢工科給事
中轉鴻臚左寺丞升兵部右侍郎洪熙元年轉左侍郎宣德六年升兵
部尚書嘗扈從北征董饜運交阯入職方朝廷遣廓往覆實戶口田
賦尋召還後命招撫河南流民歸者數萬戶尚書張本卒以廓代之

河南百州縣七郡所分治前歲農事缺旱潦始復繼衣
食既無資民生曷由遂顧予位民上日夕懷憂媿爾有

敦厚資其往勤撫字徒者必輯綏饑者必賑濟咨詢必周歷毋憚躬勞勤虛文徒瑣碎所至皆實惠勉旃罄乃誠庶用副予意

憫農詩示吏部尚書郭璫

雷禮列卿紀郭璫初名進字時用保定新安人由國子生出身永樂初為戶部主事歷遷福建參議山東參政進工部右侍郎改吏部洪熙初兼少詹事宣德初命掌行在詹事府事進尚書

農者國所重八政之本源辛苦事耕作憂勞亘晨昏豐年僅能給歉歲安可論既無糠覈肥安得緼絮温恭惟祖宗法周悉今具存遐邇同一視覆育如乾坤嘗聞古循吏卓有父母恩惟當慎所擇庶用安黎元

示戶部尚書夏原吉

關中歲屢歉民食無所資郡縣既上言能不軫恤之周
禮十二政散貨首所宜給帛遣使者發廩飭有司臨軒
戒將命遄往毋遲遲命下苟或後施濟安所期吾聞有
道世民免寒與饑循己不遑寧因請書媿詞

捕蝗詩示尚書郭敦

雷禮列卿紀郭敦字仲厚東昌棠邑人洪武癸酉中鄉試後入太學擢
戶部主事出知衢州府庶務畢舉召為監察御史升河南布政司左參
政調陝西以禮部尚書胡濙薦擢禮部右侍郎巡撫順天等處洪熙初
降太僕卿旋進戶部左侍郎兼詹事府少詹事宣德二年升戶部尚書

蝗蝻雖微物為患良不細其生實蕃滋殄滅端匪易方
秋禾黍茂芄芃各生遂所忻歲將登奄忽蝗已至害苗
及根節而况葉與穗傷哉隴畝植民命之所繫一旦盡
于斯何以卒年歲上帝仁下民詎非人所致修省勿敢

怠民患可坐視去螟古有詩捕蝗亦有使除患與養患
昔人論已備拯民於水火勗哉勿玩愒

減租詩

實錄宣德七年三月庚申朔勅諭行在部院近年百姓稅糧遠運艱難
官田糧重艱難尤甚自宣德七年為始但係官田塘地稅糧不分古額
近額悉依五年二月勅諭恩例減免中外該管官不許故違辛酉上退
朝御左順門謂尚書胡濙曰朕昨以官田賦重百姓苦之詔減十之三
以蘇民力嘗聞外間有言朝廷每下詔蠲租稅而戶部皆不準甚者文
移戒約有司有勿以詔書為詞之語若果然則是廢格詔言壅遏恩澤
不使下流其咎若何今減租之令務在必行書曰民惟邦本本固邦寧
有子曰百姓不足君孰與足卿等皆士人豈不知此朕昨有詩述此意
卿當體念勿忘也六月戊子朔知蘇州府事况鍾上言近奉詔書官民
田地有荒蕪者召佃種官田準民田起科無糧者勘實除豁租額臣
勘得崑山等縣民以死徙從軍除籍者三萬三千四百七十二戶所遺
官田召佃種應準民田科者二千九百八十二頃其間應減秋糧一
十四萬九千五百一十石已嘗申達戶部未奉處分况官田有没入海
者糧額尚在乞皆如詔書除豁從之七月戊午戶部奏直隸松江府屬
舊設官田宜準民田例起科古額官田積年逋負稅糧請
蠲以甦民困上從之仍命今後各處官田糧俱準此例

官租頗繁重在昔蓋有因而此服田者本皆貧下民耕作既勤勞輸納亦苦辛遂令衣食微曷以贍其身殷念惻予懷故跡安得循下詔減十三行之四方均先王視萬姓有若父子親茲惟重邦本豈曰矜吾仁

憫旱詩

實錄宣德六年乙酉上以天久不雨禱祠未應憂之作憫旱詩

亢陽久不雨夏景將及終禾稼紛欲槁望霓切三農祠神既無益老壯憂忡忡饘粥不得繼何以至歲窮予爲兆民主所憂與民同仰首瞻紫微籲天攄精忠天德在發育豈忍民瘼痼施霖貴及早其必昭感通翹跂望有滄冀以蘇疲瘵

草書歌賜程南雲

有序 宣德七年二月

朕幾務之餘游心載籍及徧觀古人翰墨有契
於懷嘗賦草書歌以寓意焉以爾日侍之勞書
以賜之

草書所自何所授初變楷法爲章奏當時作者最得名
崔瑗杜度張伯英三人真蹟已罕見後來繼之有羲獻
筆端變化妙入神逸態雄姿看勁健風驚電掣浮雲飛
蛟龍奮躍猛虎馳漢晉草法千載師張顛藏真亦絕奇
一代精藝才數輩遺墨千人萬人愛固知頓挫出腕力
亦用飛動生神采古來篆籀今已譌何況隸草譌愈多
吾書豈必論工緻誠懸有言當默識

何喬遠曰章皇寤寐思賢未嘗一日去書下筆蠡涌皆傳修齊治平之道翰墨圖回隨意所在盡極精妙錢謙益曰帝天縱神敏遜志經史長篇短歌援筆立就每試進士輒自撰程文曰此不當會元及第耶萬幾之暇游戲翰墨點染寫生遂與宣和爭勝而運際雍熙治降文景君

臣同游賡歌繼作則尤

千古帝王所希邁也

詩話景陵當海宇承平之日肆意篇章嘗於九年元夕羣臣觀燈各獻

詩賦彙成六冊惜今已無存即所遺御製集諸詩視民如傷從善不及

宜薛祿武人比之南仲

山甫而拊心感泣也

英宗睿皇帝

一首

帝諱祁鎮宣宗長子建元正統十四年北狩皇

弟郕王祁鈺奉皇太后令即皇帝位改元景泰

尊帝為太上皇帝景泰元年帝還自迤北居南

宮七年奪門復辟改元天順八年崩葬裕陵

在石

門山距獻謚曰法天立道仁明誠敬昭文憲武至

陵西三里